

**Kommunit Namminersorlutilu Oqartussat missingersuutaat naatsorsuutaallu pillugit****Inatsisartut inatsisaata allanngortinnejarnissaat pillugu Inatsisartut inatsisaat***Aningaasaqarnermut Nunamullu Namminermut Naalakkersuisumit saqqummiunneqartoq***pillugu****Aningaasaqarnermut Akileraartarnermullu Ataatsimiititaliap****siunnersuutip aappassaaneerneqarneranut****ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Jens Napaattooq, Naleraq, siulittaasoq

Inatsisartunut ilaasortaq Erik Jensen, Siumut, siulittaasup tullia

Inatsisartunut ilaasortaq Agathe Fontain, Inuit Ataqatigiit

Inatsisartunut ilaasortaq Vivian Motzfeldt, Siumut

Inatsisartunut ilaasortaq Hans Aronsen, Inuit Ataqatigiit

Inatsisartunut ilaasortaq Jens-Frederik Nielsen, Demokraatit

Inatsisartunut ilaasortaq Aqqalu Jeremiassen, Atassut

UKA2021-mi ulloq 6. oktober siullermeerininnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Inatsisisatut siunnersuut una aqqutigalugu kommunit Namminersorlutilu Oqartussat missingersuutaasa naatsorsuutaasalu allanngortinnejarnissaat Naalakkersuisut kissaatigaat. Allannguinikkut siunertarineqarpoq missingersuutit inissisimaneerannik naatsorsueriaatsip allanngortinnejarnissa, tassungalu ilanngullugu pisortat aningaasartuutaasa qaffariarnissaannik killilersimaarinninnissaq, akiitsunik isumakkeerinninnissamut kommuninut ataasiartumik akuersissuteqarneq aammalu pisortat ataatsimoorlutik qarasaasiaat pillugit malittarisassanik erseqqissaaneq. Tamatuma saniatigut siuliani allassimasut kingunerisaannik arlalinnik iluarsiissuteqartoqarpoq.

## **Siunnersuutip Inatsisartunit siullermeerneqarnera**

Siunnersuut siullermeerinninnermi partiinit tamanit akuersaartumik pissuseqarfingineqarpoq. Missingersuutit inissisimanerannik naatsorsueriaaseq tassungalu atatillugu innuttaasunut inuaqatigiinnullu kingunerisassat oqallinnermi immikkut sammineqarput. Taamatuttaaq akileraarutinik qaffaanerit kiisalu aserfallatsaaliinermut iluarsaanermullu aningaasartuutit oqallinnermi sammineqarput.

## **Tusarniaanermut akissutit**

Tusarniaanermut akissutit inatsisisstatut siunnersuummut ilanngunneqarput, tamannalu Inatsisartut Siulittaasoqarfiata ilusiliinermut piumasaqaataanut naapertuuppoq.

Inatsisisstatut siunnersuutaqqaartoq ulloq 8. januar 2021-mi akissuteqarnissamut piffissaliullugu ulloq 8. december 2020-mi tusarniaassutigineqarsimasoq ataatsimiititaliamit paasineqarpoq. Piffissaq tusarniaaviusoq ataatsimiititaliamit naapertuuttutut isigineqarpoq. Tusarniaanermut piffissaliunneqartup qaangiunnerani inatsisisstatut siunnersuut maannatut iluseqalersillugu naleqqussarneqarsimavoq aammalu ulloq 7. juni 2021-imit 2. juli 2021-mut tusarniutigeqqinnejqarsimalluni. Piffissaq tusarniaaviusoq taanna ataatsimiititaliamit naammattutut aamma isigineqarpoq.

Tusarniaanermut allakkiaq naapertorlugu tusarniaanermi siullermi uku tusarniaavigineqarput: Namminersorlutik Oqartussani Naalakkersuisoqarfiit tamarmik, kommunit tamarmik, Sulisitsisut, SIK aamma NUSUKA.

Tusarniaanermut allakkiaq naapertorlugu aappassaanik tusarniaanermi uku tusarniaavigineqarput:

Kommune Kujalleq, Kommuneqarfik Sermersooq, Qeqqata Kommunia, Kommune Qeqertalik, Avannaata Kommunia, Sulisitsisut, S.I.K., EY, BDO, Deloitte, Grønlands Revisionskontor, Nunatsinni Advokatit /Grønlandske Advokater aammalu Namminersorlutik Oqartussani Naalakkersuisoqarfiit tamarmik.

Tusarniaanernili marluusuni tusarniaaffigineqartut assigiissimasut tusarniaanermut allakkiami piffimmi allami allassimasoq ataatsimiititaliamit maluginiarneqarpoq.

## **Ataatsimiititaliap siunnersuummik suliarinninnera**

Siunnersuutip immikkoortui ataasiakkaat ataatsimiititaliap immikkoortumi matumani sammissavai pisariaqarfiatigullu oqaaseqarfingisarlugit. Taamatuttaaq siullermeerinninnermi oqallisigineqartut ataatsimiititaliamit sammineqassapput.

*Aningaasaqarnermut Ataatsimiititaliap aallarniutigalugu oqaaseqaatai:*

Inatsisisstatut siunnersuummut matumunnga Naalakkersuisut tunngavilersuutaat

nalinginnaasumik nassuaatini allassimasut Aningaasaqarnermut Ataatsimiititaliamit aallarniutigalugu maluginiarneqarput. Kalaallit Nunaanni akinut akissarsianullu agguaqatigiissillugu iluarsiissuteqareernermermi naalagaaffiup ataatsimoortumik tapiissutaasa sunniutaarukkiartornerat eqqarsaatigalugu pisortat oqartussaasut ukiuni aggersuni akisussaassuseqarnermik takutitsisariaqarnerat Aningaasaqarnermut Ataatsimiititaliamit isumaqataaffigineqarpoq. Tamatuttaaq innuttaasut amerlanerusut innuttaasunit inuussutissarsiorsinnaassuseqartunit pilersorneqartussaanerat nunatsinni unammilligassaavoq. Tamatuma ilaatut pisortat aningaasartuutaasa BNP-mut ilaasut Naalakkersuisunit ikilisarniarneqartut Aningaasaqarnermut Ataatsimiititaliamit maluginiarneqarpoq. Pisortani ingerlatsinerup eqaannerulernefera ingerlatsinermi sulisunik pisariaqartitsineq piffissap ingerlanerani annikinnerulersissagaa Naalakkersuisut oqaatigaat. Naalakkersuisut ilanngullugu oqaatigaat pisariaqartitsinerup annikinnerulerneferatigut sulisussanik piginnaaneqarluartunuk namminersortut pissarsinissamut periarfissaat pitsaanerulersinneqassasut. Tamatumani Aningaasaqarnermut Ataatsimiititaliamit oqaatigineqassaaq imaanngimmat pisortani sulisut piginnaasaat aammalu namminersortut pissarsiarerusutaat imminnut naapertuuttut. Tamanna pillugu Aningaasaqarnermut Siunnersuisoqatigiit nalunaarusiamini "*Kalaallit Nunaata aningaasaqarnera, Uquiaq 2021*" (quppernerit 30-32) oqaatigaat sulisussaqarniarnermik ajornartorsiutip iliuuseqarfingineqarnissaa qitiusoq. Tamanna ilaatigut iluarsaaqqinnikkut, tassungalu ilanngullugu ilinniartitaanikkut.

*Missingersuutit inissisimanerat:*

Kommunini Namminersorlutilu Oqartussani missingersuutit inissisimanerannik naatsorsueriaaseq inatsisissatut siunnersummi matumani allannguutit pingaarcerit ilagaat. Missingersuutit inissisimanerannik naatsorsueriaatsip naapertuitinnginera pissutigalugu missingersuutit oqimaaqatigiinnissaannik imaluunniit sinneqartoofiunissaannik piumasaqaat pillugu aalajangersakkat UKA 2018-imili atorunnaarsikkallarneqarsimasut ataatsimiititaliamit oqaatigineqassaaq. Siunnersuut una aqqutigalugu piumasaqaatip iluarsiissuteqartillugu atuutilerseqqinnejarnissaa Naalakkersuisut kissaatigaat. Tamatumani piumasaqaat taanna pillugu immikkoortut pingaarutillit tallimat Aningaasaqarnermut Ataatsimiititaliamit tikikkumaneqarput:

1. Missingersuutit oqimaaqatigiinnissaannik sinneqartoofiunissaannilluunniit piumasaqaat nutaaq § 2 naapertorlugu piffissamut ukiunik sisamanik sivisussuseqartumut, tassalu ukiumut missingersuusiorfiusumut/ningaasanut inatsiseqarfiusumut aggersumut tamatumal ukiunut missingersuusiorfiusunut pingasunut, naatsorsorneqassaaq. Aningaasanut inatsiseqarfiusumut aggersumut aammalu tamatumal kingorna ukiunut missingersuusiorfiusunut **kiisalu** ukiut siuliinut naatsorsuusiorfiusunut pingasunut naatsorsuusiornissamik piumasaqaat immikkoortumut kingullertut taasamut tunngatillugu atorunnaarmat Aningaasaqarnermut Ataatsimiititaliamit oqaatigineqassaaq. Taamaalillunilu maanna aalajangersagaasuni naatsorsuutinut

- tunngasumik piumasaqaatit atorunnaarpuit missingersuutillu qitiutinneqalerlutik.
2. Namminersorlutik Oqartussat kiisalu kommunit aningaasartuutaasa killilersimaarneqarnissaannut piumasaqaatinik nutaanik atuutsitsisoqalerpoq. Piumasaqaatip ilaata maanna atuuttup (atorunnaarsinneqartup) kingunerisaanik kommunimi imaluunniit Namminersorlutik Oqartussani aningaasartuutit ukiumi ataatsimi annerpaamik 1,5 %-imik ukiullu sisamat ingerlaneranni katillugit annerpaamik 2,0 %-mik qaffassinnaasut, tamanna inatsisissatut siunnersuut una aqqutigalugu ukiumi ataatsimi 1,0 %-imik ukiullu sisamat ingerlaneranni katillugit 2,0 %-imik qaffassinnaasunngorlugu appartinnejassaaq. Taamatuttaaq ataatsimiititaliamit oqaatigineqassaaq tamanna ingerlatsinermut aningaasaliissutinut taamaallaat atuussimagaluarluni inatsisissatut siunnersuut una aqqutigalugu aamma tapiissutitut aningaasaliissutinut sanaartornermullu aningaasaliissutinut atuutsinneqalermat, taamaattorli § 2, imm. 3-7-imililaatinneqanngitsutut taanertut minillugit.
  3. Kommunit Namminersorlutillu Oqartussat aningaasartuutaasa killilersimaarneqarnissaat siunertaralugu maleruagassamik atuutsitsilernissaq inatsisissatut siunnersuut una aqqutigalugu Naalakkersuisut siunnersuutigaat (imm. 4-7).
- Maleruagassat taakku pillugit inatsisissatut siunnersummut nalinginnaasumik nassuaatini ima allassimammat ataatsimiititaliamit oqaatigineqassaaq:

*"Inerneraa, malittarisassat allanut naleqqiullugit annikitsortai ilanngunnagit nalilersuinernik tunngaveqarlutik suliarineqarsimanerat, taakku allaassutsinik assigiinnngitsunik suliassaqarfinni tamani immikkoortuni atuussinnaasunik eqqarsaatigineqanngillat. Assersuutigalugu innuttaasut amerliartornerisa imaluunniit innuttaasut ikiliartornerisa akornanni malittarisassanut atatillugu kommunimut imaluunniit kommunimut nuuttut, innuttaasut sulisinnaasutut imaluunniit sulisinnaanngitsutut ukiullit pineqarnersut immikkoortinneqarsinnaanngillat" (upperneq 8)*

Innuttaasut pisortanit tunniuttakkanik pisariaqartitsisuunerusut (assersuutigalugu meeqqat/nuusuttut atuartussat) kommunimut nuuppata imaluunniit innuttaasut inuussutissarsiorsinnaasut kommunimut nuuppata tamanna kommuninut kinguneqassaaq. Assersuummi kingullertut taaneqartumi innuttaasunut atugarissaarnissamut tunniuttakkanik pisariaqartitsisunut akiliisussanik kommuni inuussutissarsiorsinnaasunik ikinnerusunik innutaqalersinnaavoq (tak. pilersugassat pilersuisinnaasunut naleqqiullugit nalinginnaasumik nassuaatini allassimasut). Taamaattumillu naatsorsueriaatsit ingerlaavartumik ineriartortinneqarnissaat ataatsimiititaliamit kaammattuutigineqarpoq. Taamaaliornikkut kommunit aningaasartuutaasa qaffakkiartornerat

pitsaanerpaamik killilersimaarneqarsinnaavoq.

4. Kommunit Namminersorlutillu Oqartussat ingerlatsinermut nuussinernullu aningaasartuutaat pillugit missingersuutinut piumasaqaat pillugu aalajangersagaq atorunnaarsinneqarallartoq inatsisisstatut siunnersuutikkut matumuunakkut peerneqarpoq. Inatsimmi atuuttumi aningaasartuutit taamaattut ukiut sisamat ingerlaneranni isertitat tamarmiusut annerpaamik 93 %-erisinnaavaat. Taarsiullugu aserfallatsaaliinermut ingerlaavartumillu iluarsaanermut aningaasanut inatsisikkut aningaasanik ingerlaavartumik immikkoortitsisarnissaq nalunaarutikkut Naalakkersuisunit aalajangerneqarsinnaasoq Naalakkersuisunit siunnersuutigineqarpoq. Taamatuttaaq naatsorsuinermi tunngaviit qanoq ittut aningaasat taakku naatsorsorneqarneranni tunngavigineqassanersut Naalakkersuisunit aalajangersarneqarsinnaavoq. Siuliani allassimasut kommuninut atuutinngitsut ataatsimiititaliamit oqaatigineqassaaq. Tamatuma ingerlanera pillugu ingerlaavartumik ilisimatinneqartarnissaq Aningaasaqarnermut Ataatsimiititaliamit kissaatigineqarpoq. Assersuutigalugu inissiaatinik aserfallatsaaliinikkut kinguaattooruteqarnermik ajornartorsiutip tamarmiusup piginnaatitsissutikkut aaqqinneqannginneranik Naalakkersuisut oqarnerat Aningaasaqarnermut Ataatsimiititaliamit isumaqatigineqarpoq.
  
5. Aningaasaliinernut aningaasartuutit, inuiaqatigiit aningaasaqarnerannut kingunerisassanik naliliinermi aningaasaliineq ataatsimut isigalugu iluanaarutaassasoq nalilerneqarpat, § 2, imm. 2 naapertorlugu aningaasartuutinut ilanngutinngitsoorneqarsinnaasut Naalakkersuisut siunnersuutigaat. Siunnersuut taanna assersuutigalugu ineqarnermut tunngasuni ungasissumut isigaluni pilersaarummik ilaqaqtinneqarpat Aningaasaqarnermut Ataatsimiititaliamit tikilluaqquneqarpoq. Taamatuttaaq suliniut aningaasanut inatsisikkut imaluunniit ilassutit aningaasaliissuteqarnikkut Inatsisartunit akuerineqassaaq. Tamatumani Aningaasaqarnermut Ataatsimiititaliamit Naalakkersuisunut eqqaasitsissutigiumaneqarpoq aningaasanut inatsit tassaammat nunatta aningaasaataanik Inatsisartut ataatsimoortumik pingaarnersiuillutik tulleriaarinerat. Illassutit aningaasaliissutit (oqaasertaliussat nutaat aamma ilanngullugit) pissutsinut aningaasanut inatsisip akuerineqarnerani siumut naatsorsuutigineqarsinnaasimanngitsunut taamaallaat atugassiaapput. Taamaattumillu inatsisisstatut siunnersuut una naapertorlugu sanaartornissamik pilersaarutinik aningaasalersuineq Inatsisartut ataatsimiinnerminni akuersissuteqarnerisigut annermik pisariaqarpoq.

Sanaartugassanut iluarsagassanullu aningaasaateqarfuit:

Namminersornerullutik Oqartussat assigalugit sanaartugassanut iluarsagassanullu

aninkaasaateqarfinnik pilersitsinissamut periarfissaqarnissamik kissaat kommuninit saqqummiunneqarsimasoq inatsisissatut siunnersummut nalinginnaasumik nassuaatini paasissutissiisutigineqarpoq. Tusarniaanermulli akissutit malillugit aaqqissuussaanera kommunit tungaannit nalornissutigineqarsorinarpooq. Tamatumani Aningaasaqarnermut Ataatsimiititaliamit kaammattutigineqassaaq sanaartugassanut iluarsagassanullu aninkaasaateqarfissat pillugit sulineq aallartilluaqqullugu kommunit Naalakkersuisunit qanimut suleqatigineqassasut.

**Kommunit naatsorsuutinik saqqummiussisarnerat:**

Naatsorsuutit aningaasaqarnermut ataatsimiititaliamit kommunalbestyrelsimit tunniunneqarneranni kukkunersiusup oqaaseqaataasa naatsorsuutinut ilanngullugit tunniunneqartarnissaat inatsisissatut siunnersuut una aqqutigalugu Naalakkersuisut kissaatigaat. Immikkoortoq taanna kommunit tusarniaanermut akissutiminni oqaaseqarfiginngilaat, taamaattumillu kommunit kissaataannut naapertuuttutut isigineqarpoq. Tassunga Aningaasaqarnermut Ataatsimiititaliaq allanik oqaaseqaatissaqanngilaq.

**Akiligassanik kinguaattoorutinik naatsorsuutitigut nalikilliliineq:**

Kommunit pisassarisaasa akilerneqanngitsut nalikilliliissutiginerisigut kommunit namminneq aningaasaatiminnik iluarsiissuteqarsinnaanerannut akuersissuteqarnissamut piginnaatinneqarnissartik inatsisissatut siunnersuutikkut matumuunakkut Naalakkersuisut kissaatigaat. Taamaaliornikkut innuttaasut kinguaattoorutiminnik akiliisussajunnaarsinneqarnerannik aammalu pisortat oqartussaasut taakkuninnga akiliisitsiniartussajunnaarsinneqarnerannik isumaqannginnerarlugu tusarniaanermut akissutini Naalakkersuisunillu oqaatigineqartoq Aningaasaqarnermut Ataatsimiititaliamit isumaqtigineqarpoq.

**Pisortani ataatsimoorluni qarasaasiaqarneq:**

Kommunit Namminersorlutilu Oqartussat qarasaasiaqarnerminni suut atussaneraat kiisalu atuineq sutigut killilerneqarsinnaanersoq inatsisissatut siunnersuut una aqqutigalugu Naalakkersuisunit erseqqissarumaneqarpoq. Kiisalu atuutilersitsinerup nalunaarutikkut pinnani allatigut pisinnaanera Naalakkersuisunit kissaatigineqarpoq. Tassunga Aningaasaqarnermut Ataatsimiititaliaq allanik oqaaseqaatissaqanngilaq.

**Akileraarutinik qaffaanerit:**

Akileraarutinik qaffaasinnaanermik apeqqut inatsisissatut siunnersummit matuminnga siullermeerininnermi saqqummiunneqarpoq. Akileraartarnermut tunngasunik Naalakkersuisut isummerfiginninnissaat akileraartarnikkut aaqqissuussinissamut ilanngunneqarumaartoq ataatsimiititaliamit maluginiarneqarpoq. Tamatuminnga ingerlatsinermut akuutinneqarnissani ataatsimiititaliap qilanaaraa.

## **Siunnersuutip aningaasaqarnikkut kingunerisassai**

Inatsisisatut siunnersuutip aningaasaqarnikkut kingunerisassai inatsisisatut siunnersummut nalinginnaasumik nassuaatini allaaserineqarput. Pisortat aningaasartuutaasa (kommunit taamatullu Namminersorlutik Oqartussat) qaffariarnerannut, innuttaasut ineriarorneranni iluarsiissutissat ilanngullugit, naatsorsueriaatsit arlallit Naalakkersuisunit taasaqarfingeqarput. Taamatuttaaq qaffariaatinut piumasaqaatit pisortanit qanoq atorneqarsinnaandersut assersuusiorfigineqarpoq. Naatsorsueriaatsinut tunngatillugu nalinginnaasumik nassuaatit matumani innersuussutigineqarput. Tamatuma saniatigut Naalakkersuisut allapput pisassat akilerneqarsinnaangitsut nalikilliliissutiginissaannut kommunit tamarmik akuersisummit piniarpata kommunit nammineerlutik aningaasaataat tamarmiusut 400 mio. kr.-it tikillugit ikileriassasut. Naatsorsuineq taanna Aningaasaqarnermut Ataatsimiitaliamit tutsuigineqarpoq.

Siunnersuutilli innuttaasunut kinguneqannginnissaa Aningaasaqarnermut Ataatsimiitaliamit akerlilerneqassaaq. Aningaasaqarneq pitsaasoq inuiaqatigiinnut iluaquataassasoq ataatsimiitaliap isumaqatigigaluaraa missingertuutit inissisimanerat pillugu siuliani immikkoortoq naapertorlugu Aningaasaqarnermut Ataatsimiitaliaq isumaqarpoq kommunini innutanut atugarissaarnikkut kinguneqarsinnaasoq. Tamanna tusarniaanermut akissuteqaamminni kommunit aamma oqaatigaat. Avannaataa Kommunianut Naalakkersuisut ima akipput:

*"Killissat nutaat pisortat ingerlataqarfiini immikkoortortani tamani aningaasartuutinik tulleriaarinissaq pillugu piumasaqaateqartut Naalakkersuisut eqqumaffigaat. Pisortat ingerlataqarfiinik allanngortitsinissaq sakkortuumik tulleriaarinertaqanngitsumik pinavianngilaq, tamatuma soorlu ilaatigut kingunerissavaa suliassaqarfiit ilaanni sipaartoqartarnissaa, suliassaqarfiit allat aningaasanik amerlanernik aningasaliiffingeqassappata. Naggataatigut tulleriaarinernut akisussaaffik soorunami politikeriniippoq, massa pisortat ingerlataqarfiini tamani apeqqutigineqartussaasoq, aningaasartuutit sorliit pisariaqarpat aamma sorliit sipaardeqarsinnaappat. Suleqatigiiffiit amerlasuut ukiuni aggersuni allannguutit piorsarsimassutsikkut allanngornertut misigissagaat ilimanarpoq."*

Tamanna Aningaasaqarnermut Ataatsimiitaliamit ima paasineqarpoq minnerunngitsumik kommunini atugarissaarneq eqqarsaatigalugu pingaarnersiukkanik allanngortiterisoqarsinnaasoq Naalakkersuisunit ilisimaneqartoq.

Inatsisisatut siunnersuummi matumani allannguutinik pisortat siunissami ingerlatsinerat aningaasartuutit qaffannerannik nassataqartussatut Naalakkersuisunit oqaatigineqanngilaq. Tunngavissatut pigineqartut tunngavigalugit allatut naliliinissamut ataatsimiitaliaq pissutissaqanngilaq. Apeqqut taanna Naalakkersuisunit sukumiisumik misissorneqarsimasoq

aammalu allaffissornerup annertunerulereratigut aningaasatigut kinguneqassanngitsoq ataatsimiitaliamit aamma tutsuigineqarpoq. Naatsorsuutiginngisamik siunnersuut allaffissornermut annertunerusumik aningaasartuuteqarnermik nassataqassagaluarpat aningaasartuutit taakku aningaasaliissutaareersut iluanni akilerneqartariaqassapput, taamaattoqarpallu suliniutinik allanik pingaannginnerusunngortitsisoqartariaqassalluni.

### **Ataatsimiitaliap inassuteqaatai**

Naalakkersuisunit allannguutissatut siunnersuutigineqartut ilanngullugit siunnersuut akuerineqassasoq **ataatsimiitaliap isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Jens Napaattooq  
Siulittaasoq

---

Erik Jensen  
Siulittaasup tullia

---

Agathe Fontain

---

Vivian Motzfeldt

---

Hans Aronsen

---

Jens-Frederik Nielsen

---

Aqqalu Jeremiassen